

弘

簡

錄

弘簡錄卷四十二

皇清翰林院侍講學士四世孫遠平校閱

庶官 唐六之三 文吏

徐申

裴胃

于頔

盧徵

班宏

王紹

李異

范傳正

戴叔倫

杜兼

從弟羔

李景略

任迪簡

樊澤

崔漢衡

韋臯

兄聿子正
貫附劉闕

林蘊

父拔

郝士美

父純

嚴綬

辛秘

崔弘禮

王遂

王式

薛元賞

李福

劉遠

祖暹

崔安潛

從子彥會

王凝

徐申字維降京兆人擢進士遷洪州長史曹王舉討李希烈敕

行刺史事任職辦治遷韶州刺史兵興四十年刺史嘗居縣治

而令丞雜處民間申乃徙治故州募人墾廢公田歲入三萬斛計諸工庸受之未幾邑閉如初剝驛侯作大市器用皆具治韶六年視始來時戶立七千比去倍而加半觀察使以狀聞遷合州刺史轉景州時方新置賜錢五十萬加節度副使遷邕管經略使黃洞納質供賦不敢桀踰年進嶺南節度使在任戢吏奸禁攻劫有職員百餘舊咸盜署畏事泄作亂覺而殺之外蕃至者未嘗贖索商賈饒盈劉闕反表發卒五千循馬援故道由巖蠻抵蜀擣其不備加檢校禮部尚書封東海郡公卒年七十贈太子少保諡曰平

裴胄字胤叔寬兄子擢明經授秘書正字轉秘書郎佐李抱王鳳翔幕府不得意謝歸更從宣欵陳少游授監察御史抱王怒劫貶桐廬尉浙西觀察判官許鴻謙重其學識一見器之薦於

觀察李栖筠復引爲觀察支使轉殿中侍御史栖筠卒嘗謫喪歸元載惡之復表少游淮南觀察判官載誅拜刑部員外遷宣州刺史楊炎仲舊惡貶汀州司馬稍遷國子司業充江西觀察使奏罷李兼月進衆推其才拜荆南節度使兼御史大夫時方剝下希慙中使過者卽悉公帑市歡獨肖簡儉恆一待之有節無何卒年七十五贈尚書右僕射諡曰成議者尚以不慊劾貶書記梁從易以是譏之

于頔字休明河南人父庭謂濟王府倉曹參軍頔少以吏事聞授京兆士曹參軍爲尹史翽所賞重從鎮襄漢奏爲監察御史充判官翽被殺收葬遣骸時人義之第五琦領度支署河東租庸使累鳳翔少尹度支郎中兼御史中丞轉遷租庸糧料鹽鐵等使以汴州轉運院累遇兵亂散失錢帛奏移河陰元載爲諸

道營田使又署郎官親昵之令於東都汝州開置屯田歷戶部
侍郎秘書少監太府卿代杜濟爲京兆尹以母憂解其爲政苛
細無大體奸任機數專候權要曲事元載其無勢利者視之蔑
如載死出爲鄭州刺史遷河南尹代還盧杞以其柔佞易制薦
爲御史大夫從幸奉天改左散騎常侍歷左千牛上將軍徙大
理卿太子少保工部尚書致仕卒時年七十四

盧徵范陽人家於鄭之中牟少涉獵書記劉晏辟爲從事委以
腹心之任累殿中侍御史後貶珍州司戶興元中元琇薦爲京
兆司錄轉度支員外郎琇得罪復貶秀州長史遷信州刺史入
爲右司郎中遷給事中戶部侍郎與竇叅善倚以自代德宗惡
叅出爲同州刺史數歲轉華州徵冀復用厚結中貴以近地人
貧竭其財賦人不堪命卒年六十四

班宏衛州汲人祖思簡春官員外郎父景倚以儒名家官至秘書監國子祭酒宏少舉進士授右司禦曹叅軍歷薛景先鳳翔掌書記高適劔南觀察判官累大理司直攝監察御史理青城山妖賊張安居速殺之無使妄引人心大安代者郭英乂奏署秘書郎兼雜令以疾免大曆三年遷起居舍人兼理匭使四遷給事中使往成德軍問李寶臣疾子惟岳匿喪求襲厚賂不受還報合旨遷刑部侍郎兼考京官駁僕射崔寧署侍郎劉廼考上下以爲撫荒靖難專在節使尺籍伍符不校省司夫上行宣美之名則下開趨競之路上行阿容下必勿嘗因削去之題知而謝曰題雖不敏敢掠一美以徼二罪乎尋改吏侍充吐蕃會盟副使貞元初仍歲旱蝗上以賦調爲急復改戶部侍郎副韓滉時竇叅方爲司直及領度支擢宏尚書上語以朕惟藉叅

爲重衆務悉委於卿叅又私許一年後卽當歸使後絕不復言
遂多持異所委中丞徐粲主揚子院事頗不理且以賄聞叅欲
代之宏執不可叅訪諸吏亦罕及宏有所疏列留中不下無何
叅以使勞加吏部尚書而宏進封蕭國公益怨以虛號見寵因
厚結權倖以傾叅宏每奉詔管建親程課役必極壯麗張滂先
善於宏薦爲司農少卿叅欲令分掌江淮鹽鐵以滂素疾惡慮
粲爲所繩因謂其強戾不可用滂聞不喜叅漸爲上疎將讓使
於宏而不欲令專其務問計於京尹禕珏云二人方交惡若分
鹽鐵轉運於滂必能制宏叅乃薦滂爲戶部侍郎鹽鐵轉運使
而以宏判度支江淮兩稅悉宏主之置巡院官令二人共擇宏
性剛愎滂請鹽鐵簿書不與署置院官更相是非莫有用者滂
乃奏宏與臣相戾臣掌國家大計倘職不修無所逃罪今巡院

多闕官何以輯事有詔遵大曆故事如劉晏韓況分掌宏在職勤恪官署晨入夕歸下吏雖勞未嘗厭苦清白勤幹見稱於時卒年七十三廢朝贈右僕射諡曰敬涉至揚州按徐粲進僕妾子姪得贓鉅萬徙于嶺表

王紹本名純字德素避憲宗諱改自太原徙京兆萬年父端第進士有名天寶間與柳芳陸據殷寅友善據嘗言端之莊芳之辯寅之介可以名世終工部員外郎紹少爲顏真卿所器奏爲武康尉再佐蕭復府爲包信租庸鹽鐵判官遣貢緣帛五十萬會李希烈阻兵江淮道梗聞由潁入汴聞德宗已西符紹督輕貨趣金商道走洋州涕泣見帝方乏春服軍士皆喜遷倉部員外郎時兵旱頻連有詔戶部收闕官俸稅茶及無名錢以修荒政卽令判務歷戶兵二部郎中事皆轉領久之進戶部侍郎判

度支又拜尚書上以其謹密者待殊異主計八年政事多所關
訪未嘗漏洩亦不矜銜順宗立王叔文奪其權轉兵部尚書俄
檢校吏部出爲東都留守元和初加檢校右僕射武寧軍節度
使復隸濠泗二州至鎮蒐輯軍政推誠示人自張愔後兵驕難
治裨將安進達唐重靖謀亂以計取之出家貨賞士舉軍安贖
復拜兵部尚書判戶部卒年七十二贈右僕射諡曰敬

李異字令叔趙州贊皇人少苦心爲學以明經調華州叅軍拔
萃登科授鄆縣尉周歷臺省至左司郎中不爲寶叅所悅出爲
常州刺史叅貶名爲給事中歷湖南江西觀察使銳於爲理加
檢校散騎常侍兼御史大夫持下以法動必察之吏不敢欺順
宗初入爲兵部侍郎杜佑稱其幹治奏爲度支鹽鐵轉運副使
俄代領使自劉晏後舉職頗艱賦入朘耗異掌使一年征課所

又類晏之多明年過之。又明年加一百八十萬貫。更歷三年。所
運江淮米五十萬斛。抵河陰。皆盈其數。歷兵吏二部。尚書使任
如故。天性精於吏職。雖在私家。案牘勾檢如公署。人吏有過。絲
毫無所貸。雖在外。常恐慄如在。異前程。異坐叔文黨。廢特薦。引
之。賴異吏才明辨。勾檢簿籍。又精於異。故異之課最異所助也。
會有疾。郎官相率省問。不言其他。但與考校程課。商略功利。卒
年七十一。贈左僕射。爲人強狠。忌刻。有所憎恨。輒殺之。叅後貶
郴州。卽所屬郡。具奏。受劉士寧賂。與藩鎮交通。激怒德宗。賜死。
議者寃之。

范傳正字西老。鄧州順陽人。父愉。戶部員外郎。與李肇交善。有
文名。傳正徵時。客遊西陲。長舉進士。宏辭書判。皆高第。授棗賢
殿校書郎。除渭南尉。拜監察御史。殿中侍御史。比部員外郎。出

爲歙湖蘇三州刺史皆有殊政進宜歙觀察使代還坐治第違制憲宗薄之不用改光祿卿以風痺卒贈左散騎常侍爲人好古性精悍初自整飭及宦益肆用度遂奢傾貲以貨權貴私公府如家帝幸素有名不至甚敗有所著西陲要略三卷

戴叔倫字幼公金壇人師事蕭頴士及門爲冠劉晏表主巡湖南至雲安楊惠琳反馳客劫之令歸金幣緩死說以朝廷責任身可殺財不可奪賊憐而捨之復表曹王臯湖南江西幕府討李希烈留領府事俄爲撫州刺史民爭溉灌爲作均水法俗便利之耕餉歲廣獄無繫囚暮年詔書褒美封譙縣男加金紫服勸執政齊映劉滋屯難未靖金穀之司不可輕易天下州縣有上中下紫望雄輔者有司銓擬皆便所私此非爲官擇人爲人求治之道其尤切者縣令錄事參軍宜出中書門下無計資序

遠近高卑一以殿最升降則人知勸映等重其言遷容管經略使經徠部落威名流聞其治清明仁恕復多方略故所至稱最德宗嘗賦中和節詩遣使者龍錫代還卒于道年五十八

杜兼字處弘宰相正倫繼子志靜之後父廌爲鄭州錄事參軍死祿山亂時兼尚幼逃入終南山與伯存介俱爲賊執臨刑號泣願爲奴以贖遂皆免建中初兼登高第辟徐泗張建封府積勞爲濠州刺史探知德宗意厭兵重代易刺史乃謀自固修武備募占勁兵三千帝以爲才素性浮險嘗橫恣僚官時進士韋賞象先孫陸楚皆名家子在幕有美譽論事忤兼誣劾以罪詔執賞等杖殺之衆莫不冤又妄繫令狐運陷李藩不克所至人咸側目元和初入爲刑部郎中改蘇州刺史比行上書言李錡必反留爲吏部郎中遷給事中尋擢河南尹素與杜佑善終始

倚爲助力所至大殺戮尚豪侈哀燕貲財極所嗜欲適幸其時未嘗敗酷好聚書至萬卷卒年七十從弟羔貞元初進士有至性父死河北母更兵亂不知所之羔憂號終日後除澤潞判官鞠獄有媼辨對不凡問之乃羔母因得奉養後卒不知父墓處晝夜哀慟一日舍佛祠觀柱間有文字乃其父臨死記墓所在羔奔往會有耆老識其壙因是得葬元和中爲萬年令時京尹元義方苛細與長安令許季同皆坐租賦不時免官復以辨列有詞奪尹俸議者以羔爲直未幾授戶部郎中後歷振武節度使以工部尚書致仕卒贈右僕射諡曰敬

李景略幽州良鄉人祖楷固本契丹李蓋忠驍將武后時與駱務整來降授左玉鈐衛將軍封燕國公務整右武威衛將軍父承悅檀州刺史密雲軍使景略陰補幽州功曹大曆末寓居河

中閫門讀書李懷光辟署朔方巡官五原有偏將張光家富于財挾私殺妻貨吏不能斷景略訊其實竟論以法因授大理司直遷監察御史嘗勸懷光殺朱泚還詣行在不聽景略出軍門慟哭曰誰知此軍一旦陷於不義軍士相顧嗔嘆甚義之遂遁歸尋辟靈武杜希全幕府轉殿中侍御史權豐州刺史豐當回紇孔道前守多懦弱遇使至輒與抗禮適遣梅錄將軍隨中官薛盈珍入朝景略欲折之托以郊迎密與盈珍言可汗新沒欲申弔禮梅錄未喻卽俯僂前哭驕容做色索然以解遂以父行呼之自此使至皆拜于庭威名顯聞希全懷忌誣奏貶袁州司馬死後徵爲左羽林將軍召見延英奏對侃侃有大臣風彩適河東李訥有疾詔拜太原少尹兼行軍司馬梅錄復遣入朝方爭位次說不能過景略叱之梅錄識其聲音疾往前趨拜遂居

次坐歲餘傳言回紇將南下陰山豐州宜得其人乃拜爲刺史兼御史大夫天德軍西受降城都防禦使至則節用約已與士卒同甘苦號令嚴肅智略精明鑿咸應永清二渠溉田數百頃公私利焉二歲後廢儲器械畢具軍聲雄冠北邊回紇畏之俄卒於鎮年五十五贈工部尚書

任迪簡京兆萬年人登進士擢累殿中侍御史天德李景略表爲節度判官天性重厚景略用法嚴偶因宴客行酒者誤進醢不忍其死盡酌之徐以他辭請易軍中悅其長者無何景略卒舉軍推以爲帥監軍使不聽拘之別室衆大呼破戶出之德宗遣使者察變具得所以然乃授豐州刺史天德軍使兼御史大夫就加散騎常侍入爲太常少卿太子左庶子張茂昭舉易定歸擢行軍司馬大將楊伯玉據城叛不納衆殺之別將張佐元

復叛又斬以徇始得入加檢校工部尚書充節度使承茂昭奢
縱後公私屈乏至欲饗士無所給自奉糞糲與士卒同甘苦在
鎮三年上下完充有疾入除工部侍郎不能朝改太子賓客卒
贈刑部尚書諡曰襄

樊澤字安時河中人父詠開元中舉草澤試大理評事澤生長
河朔相衛節度薛嵩奏為磁州司倉擢堯山縣令建中元年舉
賢良對策禮部侍郎子邵厚遇之復善楊炎薦為左補闕歷都
官員外郎尋充入蕃使徙鳳翔張益與吐蕃尚結贊會盟於清
水遷金部郎中兼御史中丞山南節度行軍司馬俄代買航為
襄州刺史兼御史大夫山南東道節度觀察等使頗與李希烈
兇黨接戰前後擒降驍將張嘉瑜杜文朝柔俊之李克誠薛翼
等收唐隨二州母憂起復右衛大將軍復代張伯儀尹江陵三

歲加檢校禮部尚書又代曹主臯凡兩領山南東道威惠著於襄漢加檢校右僕射卒年五十贈司空諡曰成生平好讀兵書兼善武藝綽有將相材器嘗召對廷英德宗嘉其論兵多與已合出與諸將射獵常貫其右人心服之賊衆畏焉

惟漢衡博平人爲人沈懿博厚善與人交始爲費令表令狐彰鄭滑掌書記遷殿中侍御史大曆六年檢校禮部員外郎爲和蕃副使還遷右司郎中建中二年吐蕃大相尚結贊請盟擢殿中少監兼御史大夫充正使偕蕃使區頰贊俱還約盟改鴻臚卿與宰相李忠臣盧杞關播惟寧尚書喬林御史大夫于頔太府卿張獻恭司農卿段秀實少府監李昌夔京兆尹王翊金吾大將軍渾瑊同盟京城之右郊帝以疆場不定復令漢衛持節送歸決於贊普乃定盟清水後藉其力吐蕃以兵佐瑊敗朱泚

武功轉秘書監俄拜上都留守淄青魏博賑給宣慰使又使幽州還奏稱旨已而賞吐蕃薄復叛盟貞元三年同會盟使渾瑊復盟平涼被執將殺之以善蕃語知其善尚結贊又得從史呂溫以身翊捍得脫蕃亦素信其誠仍加溫撫厚給養之至河州得還明年出爲晉慈隰觀察使卒贈尚書左僕射

韋臯字城武京兆萬年人六代祖範有功周隋間臯起家建陵掾郎調華州叅軍累辟帥府權監察御史署張鎰鳳翔營田判官轉殿中侍御史知隴州行營留事楊炎使朱泚援東川留范陽兵五百統以故將牛雲光泚叛雲光謀請臯爲帥劫以臣泚別將翟暉伺知白臯爲備雲光知事洩率衆奔泚至汧陽遇僕隸蘇玉還語太尉已登寶位使授臯御史中丞君可引還雲光從之臯迎勞僞受泚詔給曰大使苟不懷詐請釋甲以安衆雲

光易臯書生命士委鏡仗臯受而內之明日置酒大會伏兵殺
玉與雲光泚又使劉海廣授臯鳳翔節度使臯亦斬以徇造其
弟平間走奉天上功德宗建隴州爲奉義軍拜臯節度使擢平
萬年尉以寵其功臯築墮血牲與士爲盟期必誅泚又馳使與
吐蕃連和隴抵獲安車駕還京召爲左金吾衛將軍遷大將軍
貞元初代張延賞鎮劔南西川拜檢校戶部尚書初雲南蠻羈
附吐蕃往往導令入寇臯至遣使招徠欲以斷蕃右臂會蠻酋
苴那時兄子烏星幼攝領部事及是還政烏星臯請皆封爲王
俾禮讓行于殊俗以化佛戾詔以爲順政王自此款邊內附約
東蠻鬼主驟傍苴夢衝皆叛吐蕃斷瀘水橋來請濟師臯遣精
卒二千與蠻共破吐蕃於臺登殺青海大酋乞滅遮遮其酋尚
結贊子勇悍久爲邊患旣亡諸酋喪膽他如臘城酋悉多楊朱

及論東柴等以次降定進檢校吏部尚書初東蠻地二十里勝
兵常數萬南倚閩羅鳳西結吐蕃狙勢熾弱爲害至是綏服之
每戰有功詔封驃傍和義王夢衝懷化王賜以兩林勿鄧等印
久之夢衝復叛遣將蘇崑斬于琵琶川立次鬼主棟棄等蠻部
震服乃建安募軍於資州控制諸蠻城龍谿於西山保納降羌
九年詔城鹽州命大將董勳張芬分出西山靈關以牽繫之遂
破吐蕃論莽熬援兵進圍維州有功封扶風縣伯於是西山女
國河隴南木白狗通和窮水清遠咄嚨八國會長皆請入朝乃
遣幕府崔佐時山石門趣雲南降南詔異牟尋石門者隋史萬
歲南征道也天寶中鮮于仲通下兵南溪道遂附臯復治之山
黎州出邛部置青溪關號曰南道詔加統押近界諸蠻西山八
國雲南安撫使俄進同中書門下平章事十三年復雋州吐蕃

怨完塹造舟謀擾邊陲輒破卻之自是筑貢臘城等九節度嬰
嬰寵官馬定德與大將八十七人舉部落皆降定德有計略習
知兵法及山川地形吐蕃每用兵常乘驛計事諸將稟其成算
懼而歸心十七年吐蕃昆明管些蠻又內附贊普怒北掠靈朔
破麟州以求報復阜出兵五萬遣鎮靜軍使陳洎由三奇威戎
軍使崔堯臣趨石門兵馬使仇冕董振走維州那毗出黃崖都
將高侗王英俊趨故松州兵馬使元膺出黎嵩州鎮南軍使韋
良金趨平曩經略使路惟明攻進租城王有道涉大度河陳孝
陽道西瀘攻尼明諾濟二城咸以八月行至十月破拔堡砦轉
戰千里吐蕃釋靈朔兵使諭莽熱來救生擒以獻帝大悅進檢
校司徒兼中書令封南康郡王御製紀功碑褒賜之順宗立加
檢校太尉遣劉闢謁王叔文請盡領劔南叔文怒欲斬闢會遣

去自以帷幄大臣。可預國大議。卽上表請皇太子監國。又上廢太子勸進。暴叔文伾等之姦。憲宗遂受禪。是歲。暴薨。年六十一。廢朝五日。贈太師諡忠武。梟治蜀二十一年。取賦斂以事。月進時論譏之。凡破吐蕃衆四十八萬。禽殺節度都督城主籠官千五百。斬首五萬餘級。獲牛羊二十五萬。收器械六百三十萬。其功烈爲西南最。善撫士卒。至婚嫁死喪皆厚資之。自以侈橫。不欲洩於朝。僚掾官秩雖顯。不使還闕。惟署屬州刺史。劉闢踵其故態。厲階始此。有陸暢者。字達夫。雅所禮愛。反。李白作蜀道。易以美晚節。務私其民。互除州租。凡三歲一復。沒後。蜀人德之。見其遺像必拜。凡刻石皆鏡其名。以示尊諱。兄聿以陰調南陵尉。遷秘書郎。辟淮南杜佑府。元和初爲國子司業。終太子右庶子。平旱卒。子正貫。字公理。初蔭爲軍父尉。舉賢良異等。除

校書郎調華原尉又中詳閑吏治科遷萬年簿累司農卿進壽州團練使宣宗立以治最拜京兆尹出爲同州刺史俄擢嶺南節度使至官清介拆毀淫祠教民毋妄祈居三歲以疾卒年六十八贈工部尚書 闕字太初擢進士宏詞二科遷累御史中丞充度支副使臯卒令主後務意帝可動益桀驁吐不臣語求兼統三川與同幕盧文若善欲授以東川惑術家言五福太一舍于蜀乃造大樓以祈祥杜黃裳言其書生狂妄可鼓而擒詔仍許自新闕不聽始下詔奪其官高崇文下成都文若先殺其族繼石自沉于江失其屍闕從數十騎走至羊灌田投水不死爲騎將鄺定進所擒檻送京師詔詰反狀對臣不敢反乃五元子弟爲惡不能制又問遣使賜節何不受始伏罪獻于廟社及徇都市斬城西南獨柳下子趨郎等九人與部將崔綱以次誅

林蘊字復夢莆田人家世通經父披字茂彥署臨汀令縣多山鬼淫祠按無鬼論以治行終府別駕蘊辟西川節度推官嫉卑專制威憤關說關反曉以逆順不聽復遺書切諫怒械于獄臨刑關陰戒其下抽刃磨其頸將以脅服之蘊叱曰死即死我頸豈奴砥石耶關知不可屈置不殺降爲唐昌尉敗後名重京師然嗜酒多忤物故不大用除滄景程權掌書記貽書宰相言國家有西土翁體之有右臂今臂不附體未數百里便爲外域涇原鳳翔邠寧三鎮擁旄鉞數十百人唯李抱玉請復河湟命將復不得人宜拔行伍之長使守秦隴王者功成作樂治定制禮豈有權臣擅制樂曲自立喪紀舜命契爲司徒今乃川強臣爲之盧從史于臯慕罪大而刑輕農桑無百分之一竭力於下者饑不得食寒不得衣邊兵菜色將帥縱侈中人十戶不足以給

一無功之卒。百卒不足奉一驕將。言皆切當世。既而權上四州軍中習聞擅地長內屬。挾權拒命。不得出。益陳君臣大誼。諭首將權。始得去。遷禮部員外郎。劉伯芻薦。授邵州刺史。卒。

郗士美字和夫。兗州金鄉人。父純字高卿。舉進士。拔萃制科。皆高第。張九齡李邕數稱之。登朝。由拾遺補闕員外郎。中諫議大夫。中書舍人。歷職不回。爲元載所忌。魚朝恩署牙將。李琮兩街功德使。恃勢桀橫。推辱京尹。純請速處其罪。載不納。辭疾還東都。十年不出。號伊川田父。德宗立。崔祐甫執政。召爲太子右庶子。集賢學士。不拜。改詹事。致仕。帝召見。褒獎。賜金紫。公卿咸祖都門。世高其節。有文集六十卷。士美少通五經史記。漢書皆能成誦。與父友蕭穎士顏真卿柳芳相論。經爲忘年交。未冠擢陽翟丞。以才佐李抱貞潞州幕府。歷王虔休李元皆留。不徙久。乃

進房州刺史兼御史大夫持節黔中經略觀察等使討平溪州
賊向子琪詔書勞慰加右散騎常侍封高平郡公遷京兆尹每
別殿延問必咨訪大政出爲鄂岳觀察使遇伊慎入朝其子宥
利主軍權母喪不赴士美托從事告之仰爲游裝宥不敢辭元
和五年改河南尹明年拜檢校工部尚書充昭義節度使出廩
錢市物自給悉罷抱真以來私厨月省米六千石羊酒稱是游
人德之又罷盧從史以私恩口餉牙兵三百人膽討王承宗遣
大將王獻督萬人爲前鋒責以恣橫逗撓斬之親鼓而前大破
賊兵時諸鎮多玩寇犯法獨士美治軍完整威震兩河最先有
功承宗大懼憲宗喜曰固知士美能辦吾事俄以疾召還歷工
刑二部尚書忠武軍節度使卒年六十四贈左僕射諡曰景生
平與人交務重然諾以是名重於世

嚴綬挺之從孫會祖方約利州司功參軍祖挺之符離尉父丹
殿中侍御史綬登大曆進士累佐使府本名家子爲吏有方略
貞元中宣歙四嶽劉贊表爲副使加侍御史政事多所咨委贊
卒傾府藏進獻山是有寵名爲刑部員外郎贊佐進獻自綬始
也未幾轉司封郎中充河東行軍司馬閩歲進銀青光祿大夫
檢校工部尚書兼太原尹北都留守元和初討楊惠琳劉闢悉
選精兵委牙將李光顏劉夏平加檢校左僕射尋拜司空封扶
風郡公在鎮以寬惠爲治軍政補署一出監軍李輔光綬惟拱
手而已居凡九年士馬蕃息境內稱治四年入拜右僕射銳於
勢利不惜名節嘗拜中使馬江湖爲御史所劾出鎮荆南進封
鄭國公招降澱州蠻首張伯靖討吳元濟加招撫使到軍月遽
發公帑賞士并厚賂中貴人以招聲譽其實無尺寸功裴度屢

言非將帥之才不可責以戎事乃拜太子少保代歸久之進位太傅封邑至三千戶卒年七十七贈太保爲人材器不踰常品事兄嫂過謹爲時所稱統臨三鎮皆號雄藩所辟士親賂爲將相者凡九人

辛秘隴西人少嗜學於禮家尤洽貞元中權明經授華源縣簿判復入等調長安尉太常高郢奏爲博士累兵部員外郎署山陵郊丘禮儀判官憲宗初拜湖州刺史李錡反易其儒者秘召牙將丘知乙夜閉城收壯士數百逆戰大破之斬其將進焚營堡以功賜金紫名爲河東范希朝行軍司馬討王承宗使主留務歷左司郎中諫議大夫汝常二州刺史河南尹蒞職修政皆有可稱進檢校工部尚書昭義軍節度兼御史大夫時承恆趙討代潞人彫莊秘至約出入齋用度比四年儲錢積糧器械堅

良復爲完鎮名起病卒年六十四贈左僕射諡曰肅後更諡懿
生平居不易第服不改初奉祿悉與親表故舊自銘其墓立定
送終制儉而不違於禮

崔弘禮字從周系出博陵北齊僕射懷遠之裔祖育常州江陰
令父孚湖州長城令弘禮自少倜儻以意氣自任及長風貌魁
偉磊落有大志通涉兵書留心軍旅之要常從宣武劉玄佐獵
夷門時鷹馳逐緩急在手一軍皆驚至京師所善李觀病死殫
楮爲治喪葬累更選用登進士書判異等官累侍御史以觀老
不應靈武李樂之辟元和中爲東都呂元膺留守叅謀爲之籌
畫籍揣賊情部分兵衆以固東都李師道謀襲洛卒以無患奏
爲留守判官擢汾隸二州刺史田弘正入覲表刺衛州充魏博
節度副使弘正伐李師道兵機多所咨逮還與復移相州長慶

元年加檢校左散騎常侍令副張弘靖鎮盧龍未及境幽鎮兵
亂復改絳州踰年汴州李弁反急追爲河南尹兼御史大夫東
都汝穎防禦副使弁平遷河陽節度使數歲整練戈矛頗壯戎
備又請闢秦渠下荒田二百頃歲收粟二萬斛詔皆從之以疾
速表請代拜檢校戶部尚書華州刺史復代烏重胤鎮天平軍
與李聽合兵討李同捷至濮州大將李萬瑀劉棠擁兵自固奪
之破賊禹城獲鎧裝數十萬表萬瑀守沂州棠守黃州又自充
開育山故渠自黃隊抵青丘師乃大濟又斬李祐鄭滑潰兵三
千更出鄆兵三千助祐遂大破賊藉屍十餘里祐望鄆拜曰活
我者惟公也凡理鄆三載文宗卽位就加檢校左僕射改東都
留守遷刑部尚書卒年六十四贈司空生平寡閑民務居鮮愛
利歷踐藩鎮無可尚之績晚節更勤蓄積物議疵之

王遂宰相方慶元孫賦性強幹以吏能聞於時尤長於興利銳於操下法頗嚴酷累遷至鄧州刺史以曉達錢穀入爲太府卿與慶支潘孟陽有私憾時議營田互相爭論言其非便憲宗怒出遂爲柳州刺史制有清能業官之語左丞呂元膺執奏遂親吏韋行素柳季常犯賊法當從坐不宜有清字柳州大郡出守爲優以制書封還上喻之方行尋爲宣歙觀察使宿兵淮西財賦正急藉以辦集事平召拜光祿卿復討李師道改檢校左散騎常侍兼御史大夫充淄青行營諸軍糧料使初計兵食三百萬賊誅簿羨貲一百萬以獻上以爲能會分師道所管州爲三鎮卽以爲沂州刺史充海等州觀察使辦於聚斂治尚褊尅不存撫諭大體所製笞杖率踰常制民吏久染汙俗率多獷戾置爲反鹵牙將王弁乘人心忿怒瞰方宴會謀集其徒殘遂於席

判官張敦實官屬李矩甫等同遇害弁自知留事帝思反側方
平拜弁開州刺史至徐州械送京斬之

王式起次子初磨爲太子正字復中制科授監察御史遷殿中
侍御史中丞歸融劾其交結鄭注王守澄出爲江陵少尹大中
朝拜晉州刺史會河曲大歉勞卹流民活者數千申嚴警備饑
寇特峨不敢道境種落避去以善最稱徙安南都護浚壕繚柵
外植刺竹蠻不敢冒遇入掠錦田步使譯者往問答以自縛叛
獠非爲寇也交阯咸憚其威不自安托以黃頭軍渡海來襲中
夜率兵圍城合謀請都護北歸式被甲乘城責讓矢旡交發衆
走翊日盡捕斬之容管以災歉久不歲貢式至始輸而占城真
臘自是慕義悉入貢獻代還又令討劇賊仇甫懿宗名問方略
奏請益兵議者因餽多惜費式奏盜若猖狂天誅不亟東南征

賦寧可保乎兵多則功速斯二者孰利帝顧左右宜與兵乃益以許滑淮南將發之日麾幟皆東靡獵獵有聲喜曰得天時矣聞賊用騎兵閱所部得吐蕃回鶻還隸數百又發龍陂監牧馬集土圍諸兒爲向導果捕斬之加檢校右散騎常侍奏餘姚豪民徐澤專魚鹽之利慈谿民陳瑛目名仕至縣令此誠巨猾窮治其奸皆榜死之徐州銀刀軍亂徙武寧節度使檢校工部尚書詔許滑兵自隨視事三日悉以計誅會詔降武寧爲團練罷歸終左金吾大將軍

薛元賞并弟元規素與李德裕善太和初爲司農少卿長於吏事能推言時弊維州之議上膏極論可因撫之潰鹵膺腹牛僧孺惡之出爲漢州刺史段文昌上其治狀遷司農卿久之拜武寧軍節度使罷泗口猥稅人以爲便轉鎮邠寧會昌中德裕當

國拜京兆尹禁屯戍勢擾府縣杖惡少剽斂坊閭戡軍折暴百姓賴安歷吏工二部領諸道鹽鐵轉運使元規復爲京兆少尹知府事德裕罷坐貶崖州元賞下除袁王傳久之復拜昭義節度使卒

李福字能之宰相石之弟太和中登進士辟楊嗣復劔南幕府崔郾引爲集賢校理調藍田尉石自薦才堪理人授監察御史累遷戶部郎中歷商鄭汝潁四州刺史進諫議大夫大中時党項震擾授夏綏銀節度使有善政徙鎮鄜州遷兵部侍郎判度支再鎮宣武入遷戶部尚書持節宣撫蜀蠻卽拜劔南西川節度使同中書門下平章事與蠻戰敗績貶斬王傳分司東都僖宗初就加留守檢校左僕射移節山南東道開訓鄉兵據險以禦王仙芝賊不敢入轉略岳鄂逼于江陵節度使楊知溫求援

自將州兵及沙陀騎五百赴之賊已殘江陵鄂聞福至乃走以勞加檢校司空還朝終太子太傅

劉潼字子固宰相晏從孫祖暹性方直歷典數州剛腸疾惡爲觀察使所敬建中末由汾州刺史名爲御史大夫盧杞憚其嚴恐必沮已所爲更薦于頊代之後終湖州刺史潼登進士杜棕表爲度支巡官遷祠部郎中大中初討党項羌命爲供軍使復河湟又判度支供軍案歷京兆少尹遣往宣諭山南劇賊挺身直叩其壘稱詔赦罪盜皆列拜約就館降還陳邊事擢右諫議大夫出爲朔方靈武節度使坐累貶鄭州刺史改湖南觀察使召爲左散騎常侍歷昭義河東西川三鎮節度時李福討南詔不利潼至西川懷以恩信蠻皆如約惟六姓持兩端爲南詔間候有卑籠部落者請討之潼因出兵襲擊俘五千人南詔大懼

自是不敢犯邊以功加檢校右僕射卒贈司空

崔安潛字進之宰相慎山弟登大中進士累歷清顯咸通中歷江南觀察忠武軍節度使王仙芝寇河南募人增陴繕械首請會兵討捕號令精明賊畏之不敢犯使大將張自勉將兵援宋州賊圍宋急官軍數却自勉收南月城斬賊二千級仙芝解去宋威忌自勉欲使蒞麾下又乞併安潛軍宰相鄭畋奏威有疑忿必殺自勉是反以功受戮安潛方抗賊有功若悉取銳兵後有緩急將何以戰又爲有勞不賞無以示天下詔止以陳許兵四千付威餘還自勉乾符中代高駢領西川節度吏凡倚駢爲姦利者皆誅之數更除繆政在任盜賊衰止蜀民又安宰相盧攜右駢誣以罪罷爲賓客分司黃巢亂僖宗幸蜀召爲太子少師王鐸奏授諸道行營副都統收復兩京以功累加至檢校侍

中鐸罷兵復爲少師留守東都龍紀初拜平盧節度使檢校太
師兼侍中代王敬武會其子師範自立不得入而還改太子太
傅卒贈太子太師諡貞孝在職長於吏事雖干戈倥傯未嘗不
身聽其獄子二柅景福中爲起居郎至尚書賸爲右拾遺從
子彥曾咸通初由太僕卿爲徐州觀察使長于撫民曉律令然
性卞急爲政剛猛徐軍素驕多怨者屬遣士戍桂林舊例三年
一更親吏尹戡徐行儉貪不恤士至期請代議加廩賜復留一
年戍者怒不俟命擅還笮判官龐勛爲亂彥曾命牙將田厚簡
往泗州慰勞而用都虞候元密伏甲任山館擊勛勛遣吏給言
士思歸不敢過請至府解甲自歸彥曾斬其吏勛陷宿州發廩
錢募亡命者掠船與騎夾岸謀而進彥曾料丁男乘城悉誅賊
家屬俄而勛傅城四面趨墉以入囚彥曾大彭館殺之自監軍

使建官屬焦璐溫廷皓李悅崔蘊柳泰盧崇嗣韋延範皆死懿宗贈刑部尚書乾符中錄其子祐之爲榮陽尉餘各贈官錄蔭有差

王凝字成庶翊會孫少孤依舅宰相鄭肅登明經進士二科累辟使府踐履臺省嘗著京城六國銘文士稱之至中書舍人禮部侍郎以不阿權倖出爲商州刺史驛當孔道吏多破產凝至乃出治賦羨銀以市馬人免橫擾徙湖南觀察使僖宗召爲兵部侍郎領鹽鐵轉運使坐舉非人謫秘書監分司東都就拜河南尹乾符四年江南盜起遷宣歙池觀察使益務儲畜完城繕器以備賊王仙芝黨屠至德遣牙將孟琢助守賊益兵欲襲南陵凝遣樊儵以舟師扼青陽違令斬之諸將皆股慄以死綴賊始不能進時環境皆盜區凝以鹽弩拒采石張疑幟遣別將馬

穎解和州附明年又大至都將王涓自永陽赴敵語以賊席勝而驕可持重待之涓意銳日趨四舍至南陵未食卽陣死焉監軍收餘卒還城恣橫不能禁趣親吏入民舍奪馬凝望見捕取斬之始不敢留會有大星墜寢庭術者令稱疾避之凝日寧爲大府東南國用所出吾規脫禍一方何賴旣而賊去遂卒年五十八贈吏部尚書諡曰貞無子以從子鑣爲嗣

弘簡錄卷四十三

明刑部員外郎仁和邵經邦弘齋學

皇清翰林院侍講學士四世孫遠平校閱

庶官 唐六之四 武職

丘行恭 薛萬均弟萬傲其叔 盛彥師 盧祖尚

劉世讓 劉蘭 李君羨 龐玉 馮立

謝叔方 李謹行父突地僧 論弓仁 孫惟貞 郭虔瓘 張孝嵩

郭知運 子英傑英父 王君奭 張守珪 從子獻恭獻甫從孫

王忠嗣 父海賓 哥舒翰 子曜 王思禮 高仙芝

封常清 衛伯玉 尉遲勝 尚可孤 來瑱

魯昊 曲環 王栖曜 子茂元 斐玢

丘行恭和之子兄弟十五人皆善騎射勇敢絕倫大業末行恭

與兄師利聚衆雍岐間以保郿城羣盜不敢窺人多依之後原
州奴賊數萬圍扶風太守竇璉堅守賊食盡無所掠散歸行恭
說賊共迎義師而自率五百人負糧持牛酒詣賊營奴賊長揖
行拱手斬之謂衆曰若皆豪傑也何爲事奴衆皆伏地曰願改
事公因率其衆與師利迎謁秦王於渭北拜光祿大夫累從戰
伐功多遷左一府驃騎錫勞甚厚從討王世充戰却山王欲嘗
賊虛實與數十騎衝出陣後限于長隄諸騎散走行恭獨從賊
騎追及流矢著王馬亟回射之發無虛鏃賊不敢前遂下拔箭
以已馬進王步執長刀斬數人大呼突陣而還隱太子誅以功
擢左衛將軍所守嚴烈僚吏畏之數坐事免太宗思其功不踰
時輒復官後從侯君集平高昌封天水郡公進右武侯將軍高
宗立遷大將軍冀陝二州刺史致仕卒年八十贈荊州刺史諡

曰襄陪葬昭陵詔斲石爲人馬象拔箭狀以旌其功係神勳

薛萬均與弟萬徹本燉煌人徙咸陽父世雄大業末爲涿郡太守兄弟因客幽州俱以材武爲羅藝所厚與藝歸歎高祖授萬均上柱國永安郡公萬徹車騎將軍武安縣公竇建德帥衆十萬寇范陽藝迎拒之萬均曰衆寡不敵宜以計勝教藝羸兵阻水誘敵而自引精騎匿城左伺建德師半渡擊之大敗其衆明年建德以二十萬騎來攻兵已緣堞兄弟率死士從地道出掩擊其背衆驚潰去秦王平劉黑闥引萬均爲右二護軍貞觀初遷殿中少監副柴紹討梁師都萬徹亦從距朔方數十里突厥兵驟至王師却兄弟奮出擊之斬其驍將突厥走遂闔師都諸將謂城險未可下萬均曰城中氣死鼓不能聲破亡兆也旣而果斬師都降其城拜左屯衛將軍俄爲沃沮道行軍副總管從

李靖討吐谷渾軍次青海各率百騎前行卒與敵遇萬均單騎
馳突無敢當者還語諸將曰賊易與耳復馳進斬數千級勇益
三軍追奔至積石山大風折旗遽命勒兵曰敵且至俄而果至
萬均直前斬其將衆遂潰追至圖倫磧乃還與靖會青海璽書
勉勞遷本衛大將軍又副侯君集擊高昌智盛降進潞國公坐
帝幸芙蓉園清宮不謹下獄憂憤卒帝驚悼舉哀命陪葬昭陵
萬淑亦有戰功貞觀初歷右領軍將軍營州都督檢校東莒
校尉封梁郡公暢武道行軍總管萬備有至行居母喪廬墓
璽書弔慰表異其門爲尚輦奉御從李勣伐高麗圍白巖城敵
兵來援契苾何力苦戰中槊萬備單馬救之何力獲免仕至左
衛將軍

盛彥師宋州虞城人少任俠大業末爲澄城長義師至汾陰率

賓客上謁授行軍總管從平京師俄與史萬寶鎮宜陽李密叛
引思歸士并號賊王伯當謀出山南鋒銳不可當萬寶懼彥師
笑曰請兵數千當爲公梟其首時密聲言入洛其實走襄城就
張善相彥師卽引衆踰洛水據其要路命士入熊耳山夾道持
滿短兵陰伏溪谷伺賊半渡橫擊之密果至首尾不相救遂斬
密與伯當以功封葛國公拜武衛將軍鎮熊州討王世充復與
萬寶軍伊闕絕山南路事平擢宋州總管刺史陳寶不以禮待
其家因事殺之及平生所惡數十家鄉人震駭徐圓朗反詔爲
安撫大使戰敗被執圓朗待之厚令作書招其弟使舉虞城降
善反罪已奉使無狀被擒若宜善待老母誓死報國慎勿念我
圓朗以爲壯士待之如舊後平得還以罪誅死

盧祖尚字季良光州樂安人父禧隋虎賁郎將累葉豪富傾財

好施以俠聞祖尚年十九武力過人大業末募壯士捕盜善于御衆所向有功盜畏之不敢入境宇文化及之亂據州自稱刺史歃血誓衆士皆感泣越王侗立遣使歸地因署本州總管封沈國公王世充募舉州歸唐賜以璽書拜本州刺史封弋陽郡公從趙郡王討輔公祏爲前軍總管下宣歙破賊帥馮惠亮懷正逼俄歷壽州都督蔣瀛二州刺史才備文武咸有能名貞觀二年徵至京改爲交州都督名見內殿面諭交州去朝廷遠前都督不稱職卿有安邊之略特茲簡任無以道遠爲辭祖尚頓首奉詔旣而託疾自解帝遣杜如晦等諭旨曰三年當名決不食言匹夫尚不負然諾旣已許朕豈宜中悔祖尚對以嶺南瘴癘臣不能飲酒當無還理遂固辭帝怒曰我使人不從何以令天下命斬于朝堂時年三十旣而悔之詔復其官

劉世讓字元欽京兆醴泉人仕隋爲徵仕郎義師入關以澤川
歸投通議大夫請安輯扶風寇唐弼餘黨降者數千授安定道
行軍總管以拒薛舉不勝遂與弟寶皆沒舉令至城下招說使
降世讓陽許之至則告守者賊兵已盡於此宜善自固以圖安
全舉重其節不加害秦王方屯高懸密遣寶間道逃歸言賊虛
實高祖悅賜其家帛千匹舉不得歸授彭州刺史俄領陝東道
行軍總管從永安王討呂崇茂軍敗復爲賊囚唐僉語以獨孤
懷恩逆謀若果得行則國難未息嗾令亡歸白發之世讓逃還
值高祖方濟河幸懷恩營驚以天使之來卽封爲弘農郡公賜
庄田一區錢百萬母喪起爲并州總管寶建德援王世充命率
萬騎出黃沙嶺襲洛州會突厥入寇又命以兵屯雁門旣而可
汗大軍至乃保武州可汗與高開道苑君璋合衆來攻城數壞

輒立柵完拒時鄭元璠在蕃又使來說世讓叱之久乃引去元璠還具道其忠賜良馬金帶未幾授廣州總管帝名問備邊策答曰突厥數南寇恃有馬邑接濟如使勇將屯崞城厚儲金帛以招降者數出奇兵略城下蹂踐禾稼敗其生業不踰歲可圖帝曰非卿無可任者乃使馳驛經略既至高滿政以地降突厥患之縱反間云與可汗爲亂帝不之察誅之并籍其家貞觀初因降者言始白其誣原其妻子

劉蘭字文郁青州北海人性多凶狡仕隋鄱陽郡書佐頗涉圖史能言成敗事見天下將亂獨北海完富潛介賊破其鄉取子女玉帛武德中淮安王神通安撫山東蘭率宗黨歸順以功拜尚書員外郎貞觀初梁師都未平上陳方略太宗擢爲夏州都督府司馬師都引突厥兵頓城下帆什旗息鼓賊疑不敢迫伺

其引去追擊破之遂進軍師都平遷豐州刺史名爲右領軍衛將軍十一年爲夏州都督長史總府事時突厥攜貳郁射設阿史那摸末率部落居河南蘭縱反間離之頡利果疑摸末懼而來降頡利急追蕭逆拒御其衆太宗嘉其能卽拜都督封平原郡公俄權代州都督以信讖記長社許絢給以劉將軍當爲天下主其子昭又言北海出天子而鄆縣尉游文芝繫獄當死因發其謀遂與其黨皆伏誅

李君羨洛州武安人初事李密後爲王世充驃騎歸高祖授上輕車都尉秦王引置左右從破宋金剛加驃騎將軍賜以宮人繒帛討世充爲馬軍副總管世充子玄應自武牢轉糧入洛君羨俘走之又從破竇建德劉黑闥所向必先登摧其鋒累授左衛府中郎將突厥至渭橋又與尉遲敬德擊破之改左武侯中

郎將封武連縣公北門長上在仗讀書不休帝嘉勞歷蘭州都督左武衛將軍先是貞觀初太白數書見太史占曰女主昌又謠言當有女武王者太宗惡之會內宴爲酒令各言小字君羨自稱五娘子帝愕然笑曰何物女子乃能健耶又忌其官名封邑皆有武字乃出爲華州刺史復與狂人員道信爲妖言御史劾之乃伏誅天授中家屬詣闕訴寃后亦欲自詫詔復官爵以禮改葬

龐玉京兆涇陽人魁梧有力事隋爲監門直閤以關中兵屬王世充擊李密百戰不勦會秦王東徇至洛玉率萬騎降高祖以舊臣禮之玉明軍法久宿衛習知朝廷制度帝顧諸將都不閑儀檢授玉領軍武衛二大將軍使衆觀以爲式出爲梁州總管巴山獠叛餘黨四奔屬縣獠爲游說不可窮躡玉不聽下令軍

中曰毅熟吾盡收以饋賊非盡吾不反聞者懼謂毅盡且餓死
乃共入賊營與所親相結斬渠長以降衆遂潰徙越州都督白
爲監門大將軍太宗時以耆舊令主東宮兵老而益勤不敢怠
小大事無不親卒帝爲廢朝贈幽州都督工部尚書

馮立同州馮翊人少有武藝略涉書記建成引爲羽衛車騎將
軍託以心膂會兵敗遁走俄自詣請死太宗數其二罪在東宮
構阻骨月昨又殺敬君弘何可逃免對曰出身事主期以効命
當戰之日遙知其他因伏地獻馘上復慰勉赦其死立已蒙貸
歸語所親上恩莫大死而復生當知所報未幾突厥至便橋命
率數百騎與戰於咸陽殺獲甚衆上聞而嘉嘆拜廣州都督前
帥多驥貨苛虐蠻獠致怨叛立到不營產利得遠近心凡任
數年甚有惠政嘗至食泉酌以自况曰吾當汝而爲食豈止一

孟耶後卒於官人思之不忘

謝叔方雍州萬年人善治軍戎初從齊王元吉征討有功奏授
屈陞直府左軍騎率府兵曹與馮立戰北闕下秦府兵幾不振
尉遲敬德傳元吉首以示叔方下馬號哭而遁明日首罪來歸
太宗稱爲義士命釋之歷遷西伊二州刺史綏邊有功恩威兼
至所部愛而敬之如事嚴父貞觀末累加銀青光祿大夫歷洪
廣二州都督卒諡曰勤

李謹行靺鞨人父突地稽部酋長隋末內附居營州授金紫光
祿大夫遼西太守武德初奉朝貢以其部爲燕州投總管劉黑
闥叛上書秦王請節度以戰功封耆國公徙部居昌平高開道
以突厥兵攻幽州突地稽邀擊敗之貞觀初進右衛將軍賜姓
李氏謹行偉容貌勇蓋軍中累遷營州都督左監門將軍家童

至數千以貨自維。彝人畏之高宗，伐高麗，命爲積石道經略大
使。與薛仁貴殿而行，留妻劉氏守所。駐城敵攻之，劉擐甲勸兵
以振敵，引去。帝嘉之，封燕郡夫人。論欽陵衆十萬寇涅中，候邏
不知，士樵采半散，謹行聞寇，至卽植旗，伐鼓開門，以伺欽陵。疑
有伏，不敢進。上元三年，破吐蕃于青海，璽書勞勉，封燕國公。卒
贈幽州都督，陪葬乾陵。

論弓仁，木吐蕃國相，欽陵之子。聖曆二年，以所統吐渾七千帳
自歸，授左玉鈐衛將軍，封酒泉郡公。神龍三年，爲朔方軍前鋒。
游奕使，令引兵出諾真水草心山，邏衛張仁愿築三受降城，開
元初，突厥九姓亂，復引軍渡漠，踰白柁林，收火拔部，喻多貞種
落降之。蹶跌思大叛，戰赤柳澗，弓仁騎纔五百，自新堡進，爲賊
所圍，度衆不敵，椎牛享士，越再宿潰圍，得人服其壯。凡闕大

小數百戰未嘗敗北賜以寶玉甲第良田等時莫與比遷至左
驍衛大將軍朔方副大使會病玄宗遣上醫馳視卒年六十六
追封撥川郡王諡曰忠孫惟貞名瑀以字行志向恢大開元
末爲左武衛將軍從幸靈武轉衛尉少卿募兵綬銀圓旬有衆
數萬從還鳳翔遷光祿卿充前鋒討擊使戰陝州以功進殿中
監史思明攻李光弼周華領兵二十萬陣河陽城下惟貞率銳
卒數千苦戰墜門而出自旦及午破之表爲開府儀同三司光
弼討史朝義令守徐州會賊將謝欽讓據陳乃假惟貞潁州刺
史斬降萬人封蕭國公實封百戶光弼病表以自代擢左領軍
衛大將軍爲英武軍使卒

郭虔瓘齊州歷城人開元初累遷驍衛將軍兼北廷都護金山
道副大總管開元二年突厥默啜遣同俄特勒圍北廷虔瓘飭

豐自守同俄單騎逼城遣勇士突斬之以功授冠軍大將軍封
太原郡公俄轉安西副大都護進潞國公賜實封百戶奏請募
關中兵萬人擊餘寇以遂前功詔許之仍給公乘所在續食將
作韋湊上言臣聞漢徙豪族以實關中不聞更募驍勇以空畿
甸矧今戶口逋耗萬人所過亘六十里州縣安所供億居人若
何而濟縱有克獲其補幾何億稽天誅將諉大事不省既而果
不見鹵還遷涼州刺史河西節度大使進右威衛大將軍安西
副都護與安撫招慰使阿史那獻數持異交許諸朝玄宗遣中
郎將王惠齋詔書諭解賜帛二千段及他珍器久之病卒代
者張孝嵩由進士姿貌雄偉身長七尺慷慨好兵常以遷任自
許在安西勸農訓士府庫盈饒徙太原尹卒

郭知運字逢時瓜州晉昌人身長七尺頗有膽略後臂虎口壯

勇善射以鬪功補秦州果毅擢累左驍衛中郎將瀚海軍經略使檢校伊州刺史兼伊吾軍使從郭虔瓘殺突厥有功加右武衛將軍封介休縣公吐蕃將全達延乞力徐寇渭源盜牧馬詔薛訥王駿等相犄角擊敗之進冠軍大將軍鄯州都督兼臨洮軍使賜資萬計開元四年突厥降戶阿悉爛跋跌思泰率衆叛執單于都護張知運詔以朔方兵追擊至黑山呼延谷敗之鹵棄仗走取知運而還復兼隴右諸軍節度經略大使六年又率兵入討吐蕃掩其無備遂至九曲獲甲馬犛牛數萬計獻俘京師詔分賜文武五品以上及朝集使三品進兼鴻臚卿攝御史中丞加封太原郡公八年率王駿兵討平六州胡康待賓拜左武衛大將軍授一子官賜金帛雜綵在西方久戎彘咸畏懼之九年卒于軍年五十五贈涼州都督諡曰威上元中配饗太公

廟 于英傑字孟武累擢左衛將軍幽州副總管開元二十一
年長史薛楚玉遣與裨將吳克勤烏知義羅守忠帥萬騎及奚
衆討契丹屯兵榆關契丹酋長可突于拒戰都山下因奚衆賊
官軍不利知義守忠引麾下遁去英傑克勤力戰死麾下六千
人不肯屈盡爲所殲 英又字元武少有勇略精武藝策名河
隴間以功遷諸衛將軍祿山亂拜秦州都督隴右採訪使賊將
高嵩擁兵入汧隴伏兵以待僞爲勞饗盡幽其衆至德二載加
兼御史中丞充隴右節度使召還改羽林大將軍掌衛兵史思
明謀掠陳蔡詔統淮南兵及叩陝鷲又改潼關防禦進御史大
夫兼神策軍節度使代宗授檢校戶部尚書元帥雍王進兵洛
陽使爲後殿東都平權知留守以功進右僕射封定襄郡王實
封三百戶素性乏檢御其麾下與朔方回紇大掠都城及鄭汝

環城十里門無居人日騎蹇爲侈伏服用奢靡甲第華侈媚事
元載以固其權未幾拜劔南節度使爲政苛暴冠剝糧賜無所
畏憚故時立玄宗所居宮爲道院地實奇勝有金像侍衛等每
尹至瞻禮而後視事及是壞其像繪輒以白居又教女伎乘馳
擊毬以資倡樂鈿鞍寶勒無慮數萬未嘗問及民事人皆怨之
會襲崔寧不克其衆反戈內攻乃奔簡州普州刺史韓澄斬首
送寧并屠其家

王君奭字威明瓜州常樂人驍勇善騎射初事郭知運爲別奏
累功至右衛副率功名與知運畧等時議以其雄武並稱王郭
卒後代爲河西隴右節度使遷右羽林將軍判涼州都督事開
元十四年吐蕃悉諾邏寇大斗谷又攻甘州焚市里而去君奭
偵知其兵疲力怠率秦州都督張景順乘水度青海襲破其衆

得德萬計以功遷大將軍封晉昌縣伯凱還拜其父壽爲少府
監玄宗宴君奐及妻夏氏於廣達樓賜金帛夏亦自有戰功封
武威郡夫人其冬吐蕃來報陷瓜州執刺史田元獻及壽殺居
人取資糧進攻玉門軍君奐聞父被執登陴西向哭兵不敢出
鹵分遣莽布支攻常樂縣令賈師順城守不下賊說師順吾衆
且還宜有以贈師順度城中財帛已盡請脫士卒衣襦悉諾遷
乃夜微營去毀瓜州城師順開門收遺械復完守備吐蕃使精
騎還巢見有備乃去初涼州有回紇契苾思結渾四部酋長君
奐徵時數爲所輕及是誣奏咸有叛謀皆獲罪驅竄司馬護輪
等不平思有以復會吐蕃問道遣使走突厥君奐率騎到肅州
將取之還至甘州護輪伏兵奪其節鉞從兵死戰力盡皆沒帝
痛惜之贈特進荊州大都督官護其葬師順岐州人論功累遷

鄯州都督隴右節度使終左領軍將軍

張守珪陝州河北人姿幹瓌壯性慷慨尚節義以戰功授平樂府別駕從郭虔瓘守北庭突厥侵輪臺遣守珪往援中道逢賊苦戰斬首千餘級禽一頭斤開元初敕復攻北庭遣山間道奏事因請引兵出蒲昌輪臺夾擊敗賊特加遊擊將軍再轉幽州良社府果毅刺史盧濟卿器之引與其坐許不十年子當節度是州願以子孫相託久之轉左金吾將軍爲建康軍使王君奭死河西震懼拜爲瓜州刺史充罷離軍使督餘衆修完故城版築方立敵又暴至衆咸失色守珪度創痍之餘詎可矢石相礮須權以勝之乃僞爲置酒會諸將作樂城上敵疑有備不敢攻伺其引去縱擊敗之自是修復廨宇收合流亡皆使復業會升瓜州爲都督府卽以守珪爲都督州地沙磧不良樹藝常積雪

水溉田。其槩場悉爲敵毀。材木無所出。及是密禱于神。一夕水暴至。大木塞川而下。因取以修復堰坊。水道如舊。州民神之。刻石紀事。明年遷鄴州刺史。隴右節度使二十一年。兼御史中丞。轉幽州長史。河北副大使。俄加採訪處置等使。契丹奚延年。梗邊。前任趙含章。薛楚玉等不能制。帝聞。每戰輒勝。大喜。其酋屈刺及牙官可突于。恐懼遣使詐降。遣右衛騎曹王悔就計其事。將謀殺悔。以叛。會有別帥李過折。與二酋爭權。不叶。悔乘間誘之夜斬。屈刺及突于盡滅其黨。以降守珪出師。次紫蒙川。大閱軍。實宴賞將士。傳二首。東都詔封李過折北平王。使統其衆。尋乃被殺。二十三年。守珪入朝。獻捷。行飲至禮。御製詩寵之。加右羽林大將軍。兼御史大夫。賜金綵。授二子官。立碑紀功。二十六年。復討契丹餘黨于捺祿山。兩獲不皆會。裨將趙堪白其陀羅。

等矯詔脅平盧軍使烏知義渡泃水擊叛奚且蹂其稼不勝而
還守珪匿其敗妄奏克獲事頗泄帝遣謁者牛仙童按實受其
厚賂歸罪真陀羅逼令自縊還奏如狀後仙童贓敗事逮守珪
以功貶括州刺史疽發背死 子獻誠少喜功名爲政寬裕有
機略隨方制變其簡廉不逮於父因亂事史思明令將兵守汴
及朝義走還不內籍所統兵民數萬來降卽拜汴州刺史封南
陽郡公改寶應軍左廂兵馬使更封鄧國公來朝代宗禮賜尤
渥擢山南西道節度使擒南山劇賊高玉兼領劍南東川時郭
英父被殺率衆戰于梓州大敗乃舉從弟獻恭自代大曆二年
入京拜戶部尚書知省事以病辭位卒 獻恭金吾將軍守瑜
子數有軍功任右羽林將軍代領劍南東川節度使大曆末破
吐蕃於岷州久之拜東都留守檢校吏部尚書常固諫盧杞無

轉饒州世許其不撓子煦積閣至夏州節度使元和八年振武
軍運李進賢及判官嚴澈居進賢家憲宗怒詔與河東王錡進
討許以便宜賜軍資緡三萬入捕亂卒蘇闥珍等數百人誅之
卒贈太子太傅 獻甫左驍衛將軍守琦子亦以軍功試光祿
卿改殿中監賈耽討梁崇義渾瑊討朱泚皆從累遷至金吾將
軍檢校工部尚書會李懷光叛吐蕃又盜邊令領禁兵戍咸陽
累年兵農安悅貞元四年授邠寧節度使爲將素有威嚴軍中
憚之至則斷山浚塹選巖要地築烽堡請復鹽州及洪門洛原
鎮屯兵遣兵馬使魏羌逐吐蕃築鹽夏二城蕃衆不敢入寇十
二年加左僕射卒贈司空

王忠嗣始名訓太原祁人徙家鄆縣父海賓以驍勇聞隴上任
太子右衛率充豐安軍使封太谷男爲郭知運先鋒禦吐蕃苦

戰渭州西界勝捷諸將嫉其功按兵不救衆寡不敵沒于陣玄
宗憐其忠贈左金吾大將軍安西大都護忠嗣年九歲授尚輦
奉御入見伏地號泣帝撫之曰此去病孤也賜今名命養禁中
肅宗爲忠王時與游及長雄毅寡言勇敢自負上與論兵應對
遽起器重之試守代州別駕大猾閉門自敏不敢干法數以輕
騎出塞忠王言其年少有復讐志恐亡之帝乃詔還蕭嵩復引
爲河西兵馬使嵩將入朝請曰從公三年無以歸報天子願帥
精銳襲鹵立功會贊普大酋閔武鬱標川提刀略陣殺獲數千
羊馬萬計嵩上其功帝大悅遷左威衛將軍檢校代北都督封
清源縣男與皇甫惟明不叶爲所搆陷貶東陽府果毅河西節
度杜希望薦其才畧詔追赴鎮進拔吐蕃新羅城以功授左威
衛耶將專知兵馬秋吐蕃復來兵數萬歷官軍而陣衆寡不敵

舉軍皆恐。忠嗣獨領所部左右馳突殺數百人。賊衆相蹂。三軍
翼擊大敗。賞功拜左金吾衛將軍領河東節度副使兼大同軍
使尋攝御史大夫爲節度使。二十九年移鎮朔方。天寶初兼靈
州都督北討奚戰柔乾河三遇三克耀武漠北高會而還時突
厥葉護新有內難乃進軍磧口振之以威烏蘇米施可汗請降
以其方疆不信營于木剌崗山謀得虛實因上平戎十八策縱
反間於拔悉密與葛邏祿回紇三部使攻多羅斯城涉昆木竟
斬米施傳首京師加左武衛大將軍築大同靜邊二城徙清塞
橫野軍實之併受降振武爲一城自是敵不敢盜塞三載加兼
河東節度採訪使進封縣公益務持重安邊嘗語人以平世爲
將要在撫循其衆豈得竭中國力以幸功名故訓練士馬隨闕
繕補士氣益盛日夜思戰輒縱詭聞伺有隙則出奇兵襲擊故

所向無不克。軍每出，各名屬長付以兵器，分給衆士。一弓一矢，皆誌姓名。軍還，按名等第，以是人知自勸，無一鏃亡失。由朔方至雲中，數千里，當要害地，開拓舊城，或自剝築，斥地各數百里。自張仁亶後，四十餘年，始繼其功。五載，惟明敗，勿詔持節判武威郡事，充河西隴右節度使。又權朔方河東，佩四將印，皆勁兵重地，控制萬里。近世未有尋遷鴻臚卿，加金紫階，錄子震秘書丞。後數出戰，青海積石，鹵輒奔破。又討吐谷渾於墨離平，其國在鎮日久，備諸邊事，得士卒心。及至河隴，頗不習物情，兼以功名富貴，自處望減於昔。乃許固讓朔方，河東二印，帝方事石堡城，問攻取計，奏言吐蕃舉國固守，若頓兵城下，費士數萬，然後可圖。恐所得不酬所失，請厲兵馬，待變。帝意不決，董廷光受詔下石堡，令分兵應接，又不立賞格，兵馬使李光弼諫曰：大夫愛

惜士卒有拒延尤心雖名受詔實奪其謀然今已付萬衆重惜
數萬段何由以賈士勇有如不捷譏言歸罪受禍必先答曰吾
固審之得一城不足制敵失之未害於國吾忍以數萬人命易
一官哉明日見責不失一金吾羽林或黔中上佐耳光弼趨出
曰大夫乃古人行事又何言安祿山方城雄武扼飛狐塞復請
助役欲遂留其兵因先期至不見而還上言祿山且亂李林甫
惡之使人誣告在昔嘗養宮中今欲奉太子詔付三司訊驗罪
應死哥舒翰方有寵極言救之帝怒起入禁中叩頭而前請以
官爵贖其罪言辭慷慨聲淚俱下帝意解貶漢陽太守久之徙
漢東郡卒年四十五後延光過期不克果訴其阻兵及翰引兵
拔石堡死亡略盡咸如所料故世號名將遇朔方互市常高馬
直諸蕃爭來其馬度少唐兵日壯後又請徙牧馬九千以實河

隴迄天寶末孳息益蕃寶應元年追贈兵部尚書

哥舒翰本突騎施首領哥舒部之裔因以爲氏祖沮左清道率世居安西家富于財父道元安西副都護翰少儻好任俠重然諾略通春秋大義初補效穀府果毅事河西節度王使攻新城稍知名王忠嗣補爲衙將疎財務施士多歸之轉大斗軍副使遷左衛郎將拒吐蕃于苦拔海吐蕃衆從山上分三行差池而下翰持半段槍迎擊所向披靡名益三軍天寶六載擢右武衛將軍關西都知兵馬使充河源軍使吐蕃每遇麥熟輒以兵來取翰先使王難得楊景暉等設伏積石軍東南谷吐蕃騎至翰自城中馳出伏起塵鬪悉殺之無隻馬還入朝上與語悅之拜鴻臚卿俄攝御史中丞西平郡太守遂代忠嗣爲隴右度支營田副大使知節度事築神威軍於青海上吐蕃攻破之更

築於龍駒島。號應龍城。其川原宜畜牧。徙流人戍之。自是吐蕃不敢近青海。八載命以朔方河東羣牧十萬衆攻吐蕃石堡城。路遙而險久不能拔。梓其麾下將高秀巖張守瑜將斬之。秀巖請更限三日如期而下。錄功拜特進子授五品官。賜物千匹。莊宅各一所。加御史大夫。十一載拜開府儀同三司入朝。與祿山不協。上使高力士和解之。久之進封涼國公。食實封三百戶。兼領河西節度楊國忠與祿山有憾。發其反狀。故厚結翰進太子太保。封西平郡王。倍增封戶。以風痺廢祿山反復起。爲皇太子先鋒。兵馬元帥。以田良丘充行軍司馬。王思禮鉗耳大福李承光蘇法鼎管崇嗣及蕃將火拔歸仁李武定渾萼契苾寧等爲裨將。統河隴朔方蕃漢兵共二十萬拒賊於潼關。上御勤政樓勞遣百僚郊餞。先驅牙旗觸門墮旄竿。折斬執旗者十五載。再

加左僕射同中書門下平章事時祿山以誅國忠爲名思禮勸
翰留兵三萬守關悉以精銳回誅國忠此漢挫七國之計翰心
許未發謀頗泄國忠大懼入見帝曰兵貴防後今潼關衆雖盛
而無後殿萬有不利京師受驚請選監牧小兒三千訓練苑中
更募萬人屯於灊上以腹心杜乾運爲將詔皆從之翰疑爲圖
已表請乾運謀麾下因名計事斬之自是兩心咸不自安翰疾
甚以軍務委良丘騎兵屬思禮步屬承光二人爭長不叶故人
無鬪志翰奏祿山雖竊河朔人心未歸請持重以待其離隙可
不血刃就擒國忠復恐謀已屢奏命率衆速出討之翰奏賊兵
遠來利于速戰王師務獲萬全利在堅守不利輕出且名四方
兵未集宜觀事勢若輕出關是墮其計然以中使相繼督責翰
不得已引師而東六月四日次于靈寶縣西原八日與賊交戰

官軍南迫險峭北臨黃河乾祐衆數千已先屯要害嶺及良丘等浮船中流以觀進退輕乾祐兵少遂促將士令進道阻擁塞無復隊伍適東風急賊縱火焚蕪將士掩而開目不得因爲所乘自相排擠皆墜于河後見前隕悉潰互相與委死者數萬呼叫振天爭投北岸翰與數百騎馳歸爲歸仁執降祿山僞授司空使招李光弼來瑒魯吳等表書讓其不死祿山知事無濟囚于苑中潛殺之其後贈太尉諡武愍翰爲將嚴峻少恩不恤士卒肆志報怨故及于禍 子曜字子明方八歲哀號憤切玄宗召見授尚輦奉御遷累光祿鴻臚二卿副李光弼討河北降安太清救宋州有功改殿中監襲封爲東都鎮守兵馬使德宗立名爲左龍武大將軍使將鳳翔邠寧涇原奉天好畤兵萬人討李希烈帝召見問卿治兵孰與父賢對曰臣安敢比先臣但斬

長蛇登封豕待罪私室臣之願也及行帝祖過化門牙又拆
人爲憂之初收汝州禽僞刺史周晃以獻希烈退保許州有詔
督戰曜進次賴橋雷震軍中七馬蹙曜懼還屯襄城希烈遣萬
人薄城苦戰破之居數月希烈自率兵三萬圍曜築甬道矢集
如雨賴李勉解去後爲東都畿汝潁節度使遷河南尹終右驍
衛上將軍贈幽州大都督子七俱以儒聞岷茂才高第有節槩
崑崙岷皆明經擢第

王思禮高麗人入居營州父虔威朔方軍將思禮少習戰鬪與
哥舒翰同籍王忠嗣麾下及翰領隴右復與中郎將周泌事翰
以拔石堡城功授右金吾衛將軍關西兵馬使兼河源軍使從
詩九曲後期當斬臨刑釋之俄加金城太守嶽山反翰奏兼太
常卿開府儀同三司充元帥府馬軍都將委以軍事潼關失守

與呂崇賁李承光同走行在肅宗責不堅守引至蕭下將斬之
宰相房瑄固諫令收後效復得赦免勸斬承光尋副瑄戰雙橋
不利更爲關內行營節度河西隴右伊西行營兵馬使屯守武
功賊將安守忠來戰退保扶風賊分兵略太和關去鳳翔五十
里行在戒嚴至德二年從元帥廣平王收西京領兵先入清宮
崇從子儀戰陝城曲沃新店敗賊軍收京東又於絳郡破賊六
千器械山積牛羊萬計遷兵部尚書封霍國公食實戶五百尋
兼潞沁等州節度使總關中潞州行營兵三萬騎八千同圍相
州軍潰惟思禮獨完遷破史思明別將萬餘衆於直千嶺光弼
徙河陽代爲太原尹河東節度副大使兼御史大夫上元元年
加司空二年薨贈太尉諡武烈生平善守計短攻戰與翰密謀
誣殺戶部尚書安思順及弟太僕卿元貞與祿山潛通徙其家

屬嶺外天下寃之然持法嚴整士不敢犯在太原器甲完精儲粟至百萬斛人以是稱

高仙芝遼東人父舍難從河西軍累功至四鎮十將諸衛將軍仙芝美姿容善騎射年二十餘從父至安西以功補遊擊將軍父憂其儒緩節度使夫蒙靈譽更加厚遇表為安西副都護四鎮都知兵馬使吐蕃謗小勃律國王妻以女連西北二十餘國皆羈屬之自田仁琬蓋嘉運三討皆無功天寶六載詔仙芝以步騎萬人往征乃分軍為三使疏勒守捉趙崇玘自北谷道入撥換守捉賈崇權自赤佛道而已與監軍邊令誠自護密國入皆約會吐蕃連雲壘至娑勒川水漲不得渡殺牲以祭已而畢渡喜日向使賊來擊我必無類今旗不露稍不濡兵皆成列是天以賊賜我時不可失因與令誠鼓衆登山日未中破之拔其

城斬五千級生擒人馬千餘衣資器甲數萬仙芝欲遂深入令誠懼不肯行乃留羸弱三千使守行營而自引精銳行三日遇坦駒嶺竟渡弱水遂至阿弩越城遣將軍席元慶以精騎一千先往緝小勃律王曰吾假道趨大勃律不窺若城也城中大會領皆素爲吐蕃腹心仙芝密令元慶曰若會領逃者第出詔書呼之賜以緡綵至則縛以待我元慶如令仙芝至乃悉斬之王及妻逃山穴中不可得指喻出降因平其國急遣元慶斷弱水藤橋吐蕃引兵至不得度連震拂林大食諸部七十二國皆降附遣判官王庭芬奏捷還至河西靈磬因捷書不待已大怒欲斬之仙芝不知所爲令誠密奏於朝言仙芝立奇功今將就死後孰爲朝廷用者帝乃召靈磬還擢仙芝鴻臚卿假御史中丞四鎮節度使以代之八載入朝加特進兼左金吾大將軍子

授五品官九載討石國俘其王以獻斬之闕下進開府儀同三司右羽林大將軍封密雲郡公祿山反命副榮王琬爲元帥領飛騎彊騎及朔方隴右等兵復出禁財募關輔士五萬出潼關東討帝御物政樓賜宴臨行幸望春亭勞遣令誠仍監其軍次于陝郡值封常清敗還仙芝急乃開太原倉悉以所有賜士卒焚其餘者引兵趨潼關勒兵繕守士氣稍振賊攻不得入引還會令誠數有所求仙芝不能應至是入奏專具言常清以賊搖衆仙芝棄地數百里朕盜廩賜帝大怒使卽軍中斬二人仙芝聞命語令誠曰我是罪也死不敢辭奈何誣我爲盜資糧上天地下三軍皆在君豈不知又顧麾下曰我募若輩本欲破賊取重賞而賊涉方銳故遷延至此意以保固關輔有罪若輩可言不爾當呼枉軍中咸呼曰枉其聲震地遂就死

封常清蒲州衙氏人從外祖犯罪流安西教之讀書多所該究
頗負才學外祖死孤貧無依年過三十未有名值高仙芝出軍
奏僉從三十餘人投牒請豫初匿其貌不納日候門下曰我慕
公義願事鞭勒故無媒自前公何見拒之深仙芝不得已竄名
僉中會遠吳請部叛詔仙芝邀擊以二千騎迫躡禽賊略盡常
清於幕下潛作露布其記井泉次舍遇賊形勢克獲謀略條最
明審仙芝取讀之皆意所欲出乃大駭異卽用之由是知名軍
還以功授墨州果毅從破小勃律擢慶王府錄事參軍充節度
判官專知四鎮倉庫屯田甲仗度支營田事仙芝每出征討常
知留務果於決斷智無碍事會仙芝托乳母子鄭德詮主家事
署爲郎將輕易常清一日自外相遇走馬突其騶士乃命左右
引至廷中推席言曰吾起細微荷中丞公過聽以主留事汝安

得無禮。今須暫假汝一死。以肅吾軍。因杖死。以而仆地。曳出之。仙芝妻及乳母哭救不能得。復擊殺諸將有罪者二人。遂以狀白仙芝。憚其公不敢讓。常清亦不謝。自是軍中服慄。畏之後。由河西節度判官入爲左羽林上將軍。久之攝御史中丞。除安西副大都護。知四鎮節度事。十三載。加御史大夫。改北庭都護。持節伊西節度使。與二子五品官賜第一。區性勤儉耐勞。苦賞罰。分明出軍。常乘騾私廩。裁畜二馬。明年入朝。帝引見。問討安祿山策。大言天下太平。久人不知戰。然事有逆順。勢有奇變。臣請馳至東京。悉募驍勇。計日渡河。取逆賊首。以獻闕下。玄宗大以爲然。明日拜范陽節度副大使。乘驛赴東京。募兵得六萬人。部分旗幟。斷河陽橋。以守。然皆市井庸保。會顏真卿遣李平入奏。常清取表發視。卽倚帳作書。勸以堅守。且傳購祿山檄數十道。

與之令分曉諸郡復三道使表論成敗皆不得對俄祿山渡河陷榮陽先驅至葵園初使驍騎拒之殺拓羯數十百人俄大軍繼至退入上東門戰不利賊鼓而進劫官吏再戰於都亭驛又不勝引兵守宣仁門復敗乃自提象門出奔陝語高仙芝曰賊銳甚難與爭鋒潼關無兵萬一奔突京師且危不如急守從之敗書聞猶欲見上陳討賊事徑入關至渭南有詔削官爵使戴罪隸仙芝效力乃令衣黑衣監左右軍無何賜死泣曰吾所以不死者恐汙衣冠戮賊手今乃甘心就戮人爲哀之

術伯玉少有膂力精武藝天寶中仗策從軍隸安西府積勞至員外諸衛將軍見中原亂思立功名慨赴長安肅宗拜爲神策兵馬使出鎮陝州行營乾元二年與賊將李歸仁戰盩厔破其騎五千積屍滿野獲馬六百匹遷羽林大將軍徙四鎮北廷

行營節度使俄復領神策軍上元二年又被史朝義於永寧加
特進封河東郡公廣德元年拜荆南節度使進封城陽郡王自
此以爵自縻徃於流俗大曆初母憂營謀起復諷將吏留已不
受詔旨大為時議所醜以朝京師卒

尉遲勝本于闐國王天寶中入朝獻名玉良馬玄宗妻以宗室
之女授右威衛將軍毗沙府都督既而與高仙芝擊破薩毗播
仙進光祿卿祿山反使弟曜攝國事勝身率兵赴難國人固留
質其少女而行肅宗嘉之拜特進兼殿中監廣德中進驃騎大
將軍遣還因請授國於隴已留宿衛加開府儀同三司封武都
郡王實封百戶乃穿築池觀厚結賓客士大夫多從之游後扈
德宗至興元拜右領軍將軍貞元初曜言本國以嫡承嗣今請
立勝子銳帝欲從之勝復固辭以曜代行國事久國人安之銳

生京華不習其俗不可遊人多賢其有讓勝後歷睦原二王傅
卒贈涼州都督

尚可孤本東莞宇文鮮卑之別種世處松漠間天寶末隸安祿
山復事史思明上元中歸降累授左右威衛大將軍封白水縣
伯以功試太常卿徙封馮翊郡王食實戶一百五十選蒞神策
軍魚朝恩器其勇養以爲子改名智德使將兵屯扶風武功歷
十餘年隊伍閑整朝恩死賜姓名李嘉勳李希烈叛搃爲荆襄
招討應援使累戰有功復本姓名朱泚亂復召率兵三千道襄
鄧而西屬賊兵銳乃壁七盤僞將仇敬忠等來攻擊卻之遂收
藍田將遷梁州又命引兵守灊上拜神策京畿渭南商州節度
招討等使敬忠復來拒戰擊斬之李晟收長安爲先鋒以功加
尚書右僕射封馮翊郡王食實戶二百又會諸軍進討李懷光

次沙苑卒于軍贈司空爲人性謹審沉壯有勳勞未嘗自矜御
衆公嚴爲晟所稱

來瑱邠州永壽人父曜奮起行間開元末爲鴻臚卿持節犢西
副大使四鎮節度使著名西邊終右領軍大將軍瑒少尚名節
慷慨有大志頗涉書史天寶初從父四鎮山左贊善大夫遷殿
中侍御史爲伊西北廷行軍司馬拾遺張鎰薦以能斷大事有
禦侮才擢穎川太守充招討使居母喪以孝聞祥山方攻穎川
張瑄薦起復城中多積粟完堙自如與賊戰城下手射皆應弦
仆前後俘殺甚衆賊使父時故將畢思琛來招不應以功就加
防禦使攝御史中丞充河淮游奕逐要招討使救南陽不勝人
情恟懼賴以綏撫訓練舉動安重賊不得侵改淮南西道節度
兩京平加開府儀同三司封穎國公食二百戶相州兵敗轉陝

號節度兼潼關防禦團練鎮守使乾元三年襄州將張維瑾殺
其帥史翹加兼御史大夫山南東道節度襄鄆均房金商隨鄆
復十州觀察處置等使既至維瑾降上元二年春破史思明餘
黨於魯山俘賊梟又戰汝州獲馬牛橐駝凡兩戰斬首萬級撫
安襄漢士庶方宜其政肅宗名入京諷衆留已至鄆復還上聞
惡之明年改襄鄆唐復隨鄆六州俄而申州王仲昇與賊戰被
禽瑱顧望不卽救司馬裴茂者始以蔭爲京兆司錄叅軍謀奪
其位表言瑱善謀而勇恐後難制宜早圖之帝乃陰奪其權外
示寵榮令節度淮西申安柝黃光沔兼河南陳豫許鄭汴曹宋
潁泗十五州加茂御史中丞襄鄆等七州防禦使以代瑱瑱懼
表言淮西無糧須麥收始可上道茂乃於商州募兵以窺去就
代宗立又諷衆固留復授襄州節度奉義軍及渭北兵馬使密

詔莧圖之寶應元年五月莧自均州浮漢而下督軍五千陣穀
水北瑱以兵迎莧大呼曰吾奉詔留鎮此州爾何名而來且示
以詔書莧軍皆曰僞也爭射之瑱走旗下副使薛南陽引奇兵
三百出其背與瑱夾擊殺獲幾盡莧脫身走至申口瑱併妻子
擒送京師責以輕愎寡謀流費州賜死瑱因入朝謝罪帝待之
無疑拜兵部尚書同中書門下平章事充山陵使程元振疾之
發瑱與巫祝言不順會王仲昇歸又言與賊合謀致已久陷帝
積怒下詔削除官爵貶播川縣尉及鄆賜死籍其家校書郎殷
亮爲備棺衾以葬帝徐悟以他事罪元振流漆州而以梁崇義
爲節度使爲瑱立祠四時致饗避瑱廳事不處哀祈禮葬詔可
廣德元年追復官爵

魯炁幽州薊人身長七尺略通書史初蔭補左羽林長上哥舒

翰引爲別奏顏真卿嘗使隴右問翰所得才武以旻示之與曲
環咸從破石堡城收河曲遷左武衛將軍復以破吐蕃踰盩功
除右領軍大將軍賜紫金魚袋祿山反拜上洛太守名對於帝
前畫攻守勢卽轉南陽兼守捉防禦使封金鄉郡公尋兼御史
大夫充山南西道節度使與山南東徐浩嶺南何履光黔中趙
國珍一同討賊時三帥尚未至先率子弟五萬屯葉縣北泚水
南賊將武令珣畢思琛等來戰於營西乘風縱火鬱氣奔營士
不可止旻與中人薛道東挺身走舉衆沒賊金資糧械悉以富
賊吳玢散兵保南陽潼關失守賊將田承嗣圍城來瑱合襄陽
魏仲犀兵來援仲犀弟孟馴率兵至明府橋望賊而走南陽食
盡餓者枕藉朝廷遣使者曹日昇宣慰加旻特進太僕卿不得
入顏真卿與中官馮廷瓌勸以乘間致命人心始固日昇復單

騎趨襄陽要糧餉令領兵千人由音聲道進至方再支持數月
被圍一年晝夜拒戰人至相食卒無叛者至德二載五月率衆
突圍走襄陽承嗣尾擊吳殊死戰二日斬獲甚衆賊引去俄拜
御史大夫襄鄧十州節度使時襄漢數百里鄉聚蕩然舉無樵
燧賊初欲剽亂江湖賴吳適扼其衝南楚獲完二京平策勳封
岐國公實封一百戶乾元元年又加淮西節度鄧州刺史領淮
西襄陽兩鎮步卒萬人騎三百同九節度兵圍相州會王師不
利吳中流矢所過剽奪其軍尤甚乃徙吳鄭陳毫節度使至新
鄭羞憐仰藥死年五十七

曲環陝州安邑人父彬監使隴右因家焉環少喜兵法資勇敢
善騎射從收洪濟等城累授果毅別將祿山反從魯吳鄧州與
武令珣戰尤力加左清道率從李抱玉屯河陽又自將兵守澤

州破賊銳將安曉拜羽林將軍復與諸將討史朝義平河北累
轉金吾大將軍大曆中戍隴州數破吐蕃加特進兼太常卿德
宗初敵寇劔南詔以邠隴兵五千馳救收七盤城威武軍雜茂
等州敵破走威名大振加太子賓客賜名馬討涇州劉文喜遷
開府儀同三司兼御史中丞封晉昌郡王邠隴都知兵馬使又
與劉元佐救徐州敗李納加御史大夫建中三年擢邠隴行營
節度使李希烈陷汴州環守寧陵戰陳州斬賊三萬五千級禽
其將翟崇暉進檢校工部尚書兼陳州刺史希烈平敗陳許節
度賜封三百戶二州比爲寇衝民苦剽鹵轉各他縣環勤身節
用寬賦斂簡條教不三歲歸者襁係訓農治兵穀食豐衍轉檢
校左僕射卒年七十四贈司空

王栖曜濮州濮陽人少遊鄉學無所知名會尚衡起義討安祿

山砦爲牙將下兗鄆諸縣軍威稍振改衙前總管進攻曹州逆將邢超然乘城號令一箭引之城氣懾逆拔曹州衛居節鎮表授右威衛將軍先鋒遊奕使隨入朝除試金吾衛將軍上元初浙東王與奏爲節度馬軍兵馬使袁晁寇亂中丞袁修奏與李長爲偏將連十餘戰生擒晁復郡邑十六授常州別駕浙西都知兵馬使時江左兵荒詔內常侍馬日新領汴滑軍五千鎮守日新貪暴賊帥蕭庭蘭乘衆怒逐之而劫其衆復乘栖霞遊奕遠郊有與共圍蘇州見賊懈怠醉迷酒色栖霞反擊敗之遷試金吾大將軍李靈曜叛浙西觀察李涵俾將四千兵犄角破賊有功加銀青光祿大夫兼御史中丞李希烈陷汴乘勝東侵襲宋州浙西節度韓泐命將弼弩數千出其不意夜入寧陵希烈晨起矢及坐帷驚曰此江淮彗士也遂不敢東貞元初拜右

龍武大將軍俄轉鄜坊丹延節度觀察使檢校禮部尚書兼御
史大夫卒於位贈右僕射諡曰成爲人性謹厚善騎射常將兵
陟敵境忽遇遊騎立表百步外射輒破的敵相顧不敢動而去
子茂元少好學上書德宗自薦擢試校書郎改太子贊善大夫
呂元膺署東都防禦判官淄青節度卒謀亂元膺率兵圍之牛
月士無敢先者茂元取一人斬之衆乃進賊遂奔潰累遷嶺南
節度使鬱落安之以財交鄭注遷涇原節度使注敗悉出家資
餽兩軍得不誅反封濮陽郡侯名爲將作監領陳許節度會昌
中徙鎮河陽會討劉稹以兼行營攻討使李德裕言其兵寡詔
王宰領陳許合義成兵援之時已病功未成而卒贈司徒諡曰
威

裴玢五世祖綽本疏勒王武德中來朝拜鷹揚大將軍封天山

郡公留籍京兆。玠初事金吾將軍論惟明。爲僚力從。幸奉天。以
功封忠義郡王。復從。惟明鎮邠坊。署偏將。值王栖曜卒。中軍將
何朝宗夜縱火作亂。玠匿不出。迎明禽獻。有詔并軍司馬崔贍
斯之授玠同州刺史。劉公濟擢爲行軍司馬。兼侍御史。公濟卒。
代爲節度觀察使。兼御史大夫。元和三年。改山南西道。其爲治
嚴稜苦節。畏遠權勢。不務貢奉。歲食敝屣。居處取避風雨。而倉
庫完實。百姓安之。入朝不事駟仗。妻乘竹輿。二侍婢黃碧縑服。
當世將帥未有及者。以疾辭位。卒。贈左僕射。諡曰節。